



湖廣通志

人物

五十二

內閣文庫	
番號	漢 14208
冊數	100 (51)
函號	函 130 1





人物志行業

漢陽府

宋張錫宋史列傳字貺之其先京兆人徙家漢陽錫由
 進士知新州遷太常博士詔選能吏知畿縣乃以錫知
 東明始至令其下曰吾所治者三恃力恃富恃贖吾所
 先也歲中以治績聞入為監察御史丁謂貶崖州議還
 內地錫疏論之由是徙雷州玉清昭應宮災連繫甚衆
 錫言天災反以罪人恐重天怒願修德以應之獄遂解
 後為京東轉運使淄青諸州人冒耕河壩地數起爭訟
 錫命籍其地收租絹歲二十餘萬訟者亦息屢遷龍圖

海虞通志 卷之五十二
閣直學士進翰林侍講學士判太常寺國子監卒贈尚書工部侍郎錫淳重清約雖貴奉養如少賤時讀書老而彌篤初舉廣文館進士考官任隨以爲第一及隨死無子屢賜其家

胡霖字作霖漢陽人由鄉舉任潭州通判文章政事大著於時 舊通志

元景厚字德載明一統志漢陽人領鄉薦至京師中書左丞許有壬師之

明程瑞楚紀漢陽人洪武初知南豐州及本郡爲政廉謹不以一私自黷辨色卽起視事日晏方罷隨事立剖庭無留牘

江恕楚紀漢陽人洪武中初令福清調崇明善判斷民不敢欺稱神君焉歷任台州知府

曹體仁漢陽儒士洪武中知東平州廉能慈惠有古循良風

計珩漢陽人永樂中由明經歷官御史以直諫忤旨罷歸 以上舊通志

張敏分省人物考漢陽人永樂中爲工部司務以才望出知曲靖軍民府有善政遠近懷服秩滿進陝西苑馬寺卿後致仕卒

黎灝孝感人宣德中舉賢良方正試知縣二年擢知嘉定州九年秩滿上計京師父老遽留監司上其狀詔復

任九年嘉定人嗣之

陳文通明一統志漢陽人才識通敏歷任有能聲累官廣東按察司

張瓚楚紀孝感人字宗器正統戊辰進士歷工部郎中通敏有才出知太原府以父憂去起復守寧波值市舶太監縱恣乃條其不法事聲稱赫然陞廣東參政提督糧儲抵攬戶於法俾民斗粟以上皆得自輸稅以克羨轉浙江布政司時寧紹二郡海溢漂人畜廬舍無算蕭山尤甚瓚分遣官屬瘞暴骸收老穉賑貧乏全活以萬計丙申擢右副都御史巡撫四川奏遷瀘州衛於渡船舖地以扼諸蠻遷者如歸後以母病歸養時松茂疊三

城在蜀爲西境與董卜接壤易爲騷動成化中詔起瓚視師瓚兵萬人分五哨先襲白草壩剪其羽翼遂渡白羊峪而岷山雪山靈山皆在其境乾海玻瓈二泉分流南北自北去爲洮河南爲江漢之源卽古維州舊地悉討平之播州土官楊輝奏稱大壩千苗倡亂瓚請立安寧宣撫司皆允之召拜戶部左侍郎懇乞終養復起總督漕運巡撫鳳陽卒於官所著有土苴稿東征錄

梅芳分省人物考黃陂人正統間領歲薦任福建理問平寇有功致仕二十餘年非公事不出題其壁曰故舊不遺請託勿許治家力行古禮里人取以爲法子五登科者三

王信字君實孝感人以功授指揮僉事征五開諸苗有功累擢指揮使出守鄖襄征石和尚劉千斤平之擢都指揮同知鎮湖廣疏陳八事切中軍政利弊進都督同知總理漕運歷鎮大邦不營私產平居靜坐讀書寒素如儒生至賑恤婚喪毫無顧吝晚徙襄陽子繼善從善皆舉進士

舊通志

王珩孝感人景泰丙子舉人通判叙州遷鳳陽府同知精敏強幹吏不敢為奸士民愛之為之梓却金集

劉奎字文瑞孝感人性孤介弘治辛酉舉人授廬州府同知攝邳州事值武宗南巡忤江彬意銜之調永寧同知謝病歸途次避雨逆旅人秦氏椎牛具亭堂有秦檜

像其祖也奎怒起曰吾乃為造次所誤古勝毋不入者何人哉時徒御者業休沐矣冒雨去之卒之日家貧幾不能葬

童綸字廷言孝感人正德辛未進士授富順知縣性清儉精敏而恬淡無異諸生舉廢墜興學校士民德之崇祀名宦

以上縣志

陳伯安分省人物考黃陂人弘治己未進士英爽有大節令章邱奪擢御史忤劉瑾論丹陽教諭瑾敗起知靈璧時巨寇楊虎嘯聚以無城被執賊見其偉岸欲降之安罵賊不屈瞋目受刃賊驚異釋去乃城靈壁民德之立祠以祀後官至副使

傅兆字以行漢陽人御史桂之子嘉靖甲午舉人爲梁
山令賦性耿介不營一私修郡志討論搜采其功居多
舊通志

王一麟字景仁漢陽人嘉靖己酉舉於鄉任台州同知
清戎伍勾逃亡兼司海防釐革冒破之弊盤查列郡追
完侵那數萬金請豁軍徒百餘人又錄方孝孺後以示
風厲晉知鎮遠府均賦簡訟民夷帖然卒於官

蔡幾字國成漢陽人嘉靖壬子舉人令望江多善政爲
人孝友沉毅篤志好古嘗手纂先儒語錄題曰守身通
論孫濬有文名

劉伯生字大鶴孝感人嘉靖乙卯與弟伯變同舉於鄉

變領解赴宴日固辭首坐臺使者令赴兄席一揖時人
榮之乙丑成進士知上蔡陞南吏部主事以母老乞歸
益向學著作甚富與弟伯變並祀鄉賢

劉伯變字小鶴伯生字弟隆慶戊辰進士少就外傳何司
寇遷偶經塾館皆遶遠避席變危坐自若師讓之變曰
何公亦人子也彼自出遊吾自讀書何憚焉遷大驚異
以弟女妻之及爲給諫有直聲劾兵部尙書郭乾薦前
侍郎萬泰都御史耿隨卿張景賢會於拱有異才可用
又言故總督曾銑朝宗憲皆立功之臣竟以罪死宜加
卹錄並報可久之外轉歷官廣東按察以母老不赴

吳崇字南紀漢陽人萬曆己卯舉人知金州薄賦省刑

海虞通志 卷之五十二
以修築北駝城功撫軍戴金舉其卓異陞平樂同知卒
於官

蕭達字文谷漢陽人爲諸生有聲家故饒嘗兩蠲千金
賑邑饑以明經知泰安州多惠政爭利害於上官不合
拂衣歸教三子良有良譽皆成進士孫丁泰亦登科
張績漢川人緒之弟以貢廷試高等耿尙書定向勸入
國學謝曰吾兄衰老平生甘苦節吾欲亟受一官資祿
以養銓次方及而卒定向爲天問辭以弔之

熊士章字文麓其先進賢人隨父任楚府典寶遂家漢
陽補庠生與江夏郭正域任家相交最篤樂善好施至
老不倦日坐市門見人有饑寒狀輒捐金與之卽僞亦

弗問年八十七卒以孫伯龍貴贈如其官

尹應元字乾泰漢川人萬曆甲戌進士起家清豐令歷
刑部郎中出知鳳陽府丁內艱補大名改正定皆以廉
能稱累擢參政備兵寧夏當哮氏亂後人情搶攘元嫻
韜畧洞邊情內撫將士外嚴戰守士皆樂爲用以功授
按察使陞僉都御史巡撫山東時倭陷朝鮮大發兵救
之元轉餉調師未嘗乏絕叙錄賜金幣礦璫陳增驕橫
誣陷益都令吳宗堯元具奏劾增堯得免歷浙江巡撫
致仕卒

雷芳字均倩孝感人萬曆庚子舉人先出嗣從父後生
第筵悉以分產與之第性介每遇水旱密令家僮以已

租入第而不使知官工部郎

秦聚奎字仲默漢陽人萬曆辛丑進士令績溪調繁吳江陞刑部主事辛亥大計以叅吏部侍郎王圖及其子元抃又舉湯賓尹爲尙書孫丕揚所糾遂罷職乙丑以吏部尙書周嘉謨薦起順天府丞踰年陞府尹時魏忠賢子良弼封侯開府議毀京兆陰陽學廣其居聚奎疏曰皇上不惜茅土之封臣亦何敢愛尺寸之土但事關國體臣死不敢奉詔觸忠賢怒奪職歸後徵拜太常不起卒年七十有五子廷燁孝廉廷焜歲薦

蕭丁泰字吉甫良有長子少從父讀書京師爲顧憲成所賞中萬曆辛丑進士授行人擢兵部主事典陝西壬

子試歷陝西左布政使時魏忠賢柄政羅織清流丁泰廉正無援乃謝官歸懷宗初起用歷四省六任藩伯豐財節用支給邊儲皆得要領晚任黔藩值水西叛與總督朱燮元調兵食議勦撫以勞瘁歿燮元爲特請祭恤王儀字鳳來漢陽人萬曆甲午舉人令山東清城邑中奸弊釐剔殆盡陞中城兵馬司知平樂府累官雲南右參政致仕歸卒子文林官福建武平令

吳極字元無漢陽人萬曆丙辰進士就南武學教授歷廣南知府請辭歸里手不釋卷著有吳氏易學聖學統宗石經大學疏旨里黨稱爲理學子伯倫舉人

王廷彥漢陽人太常秩之子由貢任荊州府教授博學

篤行以孝稱尤介於取與任荆南日署內有窖金掘得之麾不顧子大倫孫銘臣皆以文名

王家賓字獻叔漢陽人萬曆己酉舉人父瑚卒廬墓三年乙丑考選當入南臺同邑魏黨潘士聞在垣中因捕糧事遂厄之出知陝州均糧薄斂以卓異舉會新撫檄建魏璫生祠投筆不署日家賓楚人也死無以見楊大洪於地下遂被叅歸子士乾孝廉孫戩有才名

孫世恪字貞伯漢陽人萬曆己酉舉人就教長沙天啟初陞國子監學正祭酒蔡毅中奇之楊漣劾魏忠賢疏上毅中率世恪等並叅奏忠賢怒矯旨切責毅中旋引去世恪亦丁艱歸懷宗初起工部主事歷戶部郎中罷歸里卒

歸里卒

王一凱字君華黃陂人萬曆辛卯舉人歷西安府同知病免歸邑令某造訪贈一紙書姓名八人曰此何人令曰盜也知公淡泊此可得百金凱曰實盜法應不貰假盜情則可矜二者之間何以教之令慚而去

以上舊志

萬言揚字存愚孝感人由孝廉令浙之新昌有禱輒應擢南道監察御史巡歷鳳陽倉及屯馬會移宮事魏璫發烈揚上言當時托孤寄命者何人肅清宮禁者何人皇上所褒爲忠直者何人自今結綬如旅而顧命之臣何以不得終其信任主事萬璟以懲一小璫又上疏累斥忠賢矯旨杖斃揚上疏謂忠賢令皇上有殺諫臣之

名其惡在二十四罪之上語皆切直因假他事削籍懷
宗初起補四川下川東道所在賊氛蹂躪親冒矢石嚴
戰守具賊不敢犯轉安綿兵備謝病歸

楊金通字黃理萬曆己未進士知丹徒縣有風力其以
理却戚畹不許輕用皇封及不附副使遷民間葬地尤
爲當時所重乙丑卓異入都會黨禍起行取諸吏謬指
爲應山族人通笑曰大洪海內名臣得附爲幸竟不辨
僅授禮部主事丁卯奉詔計於周藩歸家卒 以上縣志

王袵字章甫一麟從子少從蕭良有學袁宏道董其昌
陳繼儒黃輝諸人俱推重之以貢入太學官華州牧遷
成都同知卒子應振貢士官教諭 舊通志

熊鳴盛字彥升士章子學問該博中天啟辛酉鄉試座
主繆昌期器重之辛未下第歸遂不復上公車一意教
子以子伯龍貴贈如其官次仲龍汝寧知府季叔龍能
文章與兄齊名

蕭驥彥字千里丁泰子天啟丁卯拔貢考授通判懷宗
丁丑省親於黔總制朱燮元見之偉其材幹以將材題
請改授遊擊從都督范廷弼討苗仲阿秀等計擒之陞
參將屢立戰功加副總兵鎮守六廣河陞貴州總兵都
督僉事卒於官

傅乃根黃陂人天啟甲子舉人任鳳陽令值歲歉民饑
力請弛徵省役稍修城堞功甫竣而流賊至民賴以全

洪州通志 卷之五十一
九
擢戶部主事時直省旱蝗公卿議捐逋賦根日救荒不
如薄歛請蠲不如無加今新餉日增而舊欠是邸何異
止沸而添薪也在廷躓之

戴自成字哲之漢陽人萬曆乙卯舉人選涇陽縣諭懷
宗辛未成進士授刑部主事歷員外郎中錄審江南人
推平恕除守徽州一切以鍾靜行之己卯建陽軍變巡
方陳起龍委鍾兵譁勞瘁卒於任

屠斯立字仁伯漢陽人懷宗癸酉舉人庚辰特授成安
令值歲旱蠲粟賑饑改調金陵卒

魏晉封字賞延漢陽人懷宗丙子舉人工古文詞性豪
俠獻逆陷省城作戰城南哀江南等詞草討獻賊檄言
圖起義年三十二未遂而卒

殷時中字虛白漢川人以選貢入監聲諫南雍令乳源
陞化州牧潔已愛民檄署海防同知海賈饋珠峻却之
以病致仕

尹賓商字亦庚應元子有雋才喜談兵名動江楚間以
恩選爲邑令忤上官罷免

羅明諭字元樞黃陂人由明經授應山訓置學田以振
恤士子陞零陵諭值鍾兵叛率士紳城守獨當巨砲處
曰此吾汎地無所逃死手放佛郎機殺賊凡三晝夜賊
窘祈降舉城獲全

劉覲文字太翼孝感諸生幼志聖學以主敬爲宗嘗曰

儉則無求肅則無妄年及耄耋不敢慢童穉族人貧窶者咸待舉火楊忠烈漣櫻瑞禍獨命其子建奇左右之李之縉字圃田孝感人事父母最孝饒有經濟明末棄諸生散財築堡於會水臺屢禦巨寇尤愛才樂善聚族里俊秀課文勸學一時掇科名者多出其門 以上舊通志

張淳孝感人懷宗辛未進士以治最考選特賜召對淳慷慨條對拔置工垣時朝政多尚綜覈言路好翁赫可喜之論淳獨引大體切時務旋擢太僕丞卒於家 縣志 唐希臯字一齋孝感人以歲貢授贛州興國令掾胥農賈皆令歌詩習禮教化大行及解綬歸置求仁館講學

病革或問曰此物如何格希臯曰一息尚存此志不少懈乃所以格之也 舊通志

皇清吳崑字自玉漢陽人喜讀書不求仕進事父母以孝聞父櫬在家鄰人不戒於火崑搶地呼號風及櫬乃出弟早卒撫兩孤如已子性好施予宗黨不能自存者置義田贍之卒年七十有八以子正治官大學士贈崑如其官 舊通志

張士彥字恢浩漢陽人性純孝母病衣不解帶置義田設塾師以仁其族明末撫兵皆得乘馬驛若為虐彥鬻腴產置馬以應之流寇羣逞修水陸二砦俾民得保其妻孥以子三異貴贈中憲大夫

姚承恩字淮濱黃陂人父錠事母至孝讀書馬鞍山雖大風雨必歸省承恩亦篤孝如其父生平諸陰德事不肯自言與諸名宿講究理學易箒時子締虞舉於鄉命之日汝年少博科名慎無妄受僮僕田宅及人請托謹識之吾無憾矣締虞另傳

宋灝字又素漢陽人懷宗壬午舉於鄉授廣東徐聞令以廉明威怒自勵歿於官

彭清典字疇五孝感貢生順治元年授池州推官有守城功丁內艱補溫州遷福建泉州同知時大軍絡繹經營調劑供億不匱而民無擾陞懷慶知府飲冰茹蘗舉卓異晉河道副使卒於官

堵維垣字四甫漢陽人訓導自新子八歲喪父事母盡孝從伯父受學好皇極洪範河洛諸書不欺暗室會還賈客遺金後以子嶷貴受封

熊伯龍字次侯鳴盛長子九歲遊泮順治戊子貢入成均試第一鄉會皆高魁榜眼及第授編修歷遷侍讀學士性孤介砥礪名節迴翔館閣二十年以文章衣被天下精藻鑑甲午典浙試所得士中狀元者三探花一督學順天及官祭酒多所識拔年五十三卒子正笏孫祖旋俱鄉薦

鄭滋字方至黃陂人少孤母王氏苦節撫之中順治戊子副榜授廣東新寧令明敏有幹材時粵初定賊

綉花針倡亂滋募敢死士捕擒之賊首乞降黠民因告變以誣大姓時議欲勒兵討之滋單騎入山寨無亂形坐誣者罪政聲大著

顧如華字質夫漢川人順治己丑進士授廣平知縣考選御史疏糾濫委清奏銷弁請復教職多所建日差理浙江鹽政商人德之轉溫處副使卒華學問淹博工吟咏與錢謙益吳偉業龔鼎孳輩鼓吹風雅一時稱盛著有艮占集蜀行藁數種傳於世

胡明垣字衛公黃陂人少隨父仰文從先輩講學望魯臺順治己丑成進士授鍾安令時伏莽爲暴民甚患之垣擒斬渠魁三人懸誠通衢餘孽以靖尋遷鳳

翔同知

李昌祚字文孫生而穎異祖若愚以遠大期之順治壬辰成進士選庶常時楚省旱祚與總憲趙開心連名入告得減田租之半授檢討

世祖章皇帝謂翰林官教養有年習知法度出祚分守河北卻餽遺革陋規興水利息訟省刑河北人至今思之陞浙西副使未三月遷大理寺卿盡心平反如解愚民聚衆之誣伸孝子復讐之義與山左逆案昭雪無辜蓋其大者移病歸里卒

賜祭葬

朱天慶字開子漢陽人善詩文與熊伯龍交最篤順

治甲午以明經考授知縣未仕卒初流賊陷城慶負
母攜姊而逃賊刃其母以身翼蔽受創幾死孤甥被
掠天慶走九江穿重壘求之以歸

蕭企昭字文超丁泰孫順治丁酉副榜入太學著有
燕臺制義名動公卿相國熊賜履最器重之於周易
河洛圖性理諸書妙有解悟究心濂洛關閩之學作
爲已說又以學莫先於辨志作定志說年三十三卒
汪以淳字淥水漢陽人順治戊戌進士初任廣東定
安知縣平易和惠政聲流溢擢吏部主事持衡不爽
熊賜瓊字宗玉孝感人順治戊戌進士與從兄賜履
同捷鄉會試授庶常海內有郊祁之目癸卯典試福

建公慎得人晉侍讀歷國子司業日率諸生講五經
四子書性沉篤能容然聞有不平事輒義形於色同
里李氏子售身他姓轉貸多金贖之六年累子母措
注以償其他扶難拯困多類此丙午請假歸旋以疾
卒

羅誥字八書孝感人少經家難辛苦力學中順治己
亥進士以母老艱於菽水不待對策徒步歸極盡孝
養立志以聖賢爲歸聞遠近有同志者芒屨襤被不
憚訪求年五十卒

程大呂字文載孝感人康熙癸丑進士性恭謹凡植
志立身悉裁以禮法凜然不少假借早失怙奉母色

養兼至戊午應博學宏詞薦當事稱其孝友性成文辭淵茂以病未試而卒 以上舊通志

夏煒字振叔孝感人叅政時亨子懷宗壬午鄉舉闖賊之亂鳩鄉勇於白雲岩為保禦計鄉里依託保全者無筭順治壬辰歲旱饑民聚黨挾借勢甚橫邑令請發兵誅之煒投書於令詞極肫切眾得免性孝友事繼母無間言撫孤姪熙臣成名業師唐烈卒於黔煒捐貲歸其櫬子熙度丙子舉人孫慶譽乙酉解元潘吟字石文孝感人順治戊子拔貢令新淦值兵燹後吟興舉廢墜建文廟築城垣修坑口渡橋清丈荒田招徠頑梗士民賴之

傅彬字郁中孝感人孝子秉愆子順治初以明經訓長沙凡明末殉難諸人皆為核實詳請不令淹沒陞蘄州學正值歲荒蠲米備賑會

王師進湖南以彬攝州篆軍旅旁午倉卒立辦民亦無擾擢翰林院待詔未任卒

譚鳳貞字韶來漢陽人順治己丑進士授大理寺右評事執法平允同列交相推重初喪父兩弟幼孤貞授徒撫之弟鳳祥歲貢生有文名

易道沛漢陽人順治己丑進士令上高甫下車詢民疾苦與利除害會歲歉捐俸賑饑並請蠲浮糧民困以甦

吳正治字廢庵漢陽人順治己丑進士授翰林院庶
吉士歷侍講出爲江西叅政分守南昌歲暮單騎行
部查刑獄凡非法淹繫者悉令釋去在任旬月劇盜
盡平遷陝西按察司甫下車檢閱舊案忽得一紙按
其科罪皆法所不宥而竟未審理意此人必地方巨
憝輦金四布上下沉攔漸成故紙耳訪之果然纔一
提訊懇寃者日百數至庭鞠得實立擬重典百姓稱
快尋擢工部侍郎調刑部江南諸生二百餘人逋糧
已完逮至盡擬監候爲入白得釋又議奉行赦款宜
速丈量田地宜停狀外指板宜禁私家條例宜酌皆
切申時政丁外艱服闋補督捕侍郎督捕專司逃人
事闕旗民立法最嚴奸人借以肆毒一經板指村落
幾空正治倡率同官合詞陳請遂除十家連坐之例
遷右都御史奏止北直四州縣增兵遷工部尙書尋
調禮部典禮多所考定壬丙辰會試得人稱盛康熙
二十一年拜武英殿大學士機務殷繁日不暇給值
秋審讞決一重案幾十餘人

聖祖顧問曰此囚尙可活乎咸以情正罪當應正治獨曰
皇上一念好生臣等敢不奉行德意退而細爲檢勘果得可
矜疑狀遂從末減

太祖高皇帝實錄成以總裁官加太子太傅後以病乞休
聖祖慰留頒賜有加屢疏陳請着以原官致仕年七十四卒

於里第

諭祭葬諡文僖子宗邵光祿寺丞宗豐丁丑進士由庶常
出爲大同令

李嘉卉字山有孝感人順治辛卯舉人初授茶陵教
諭吳逆猖亂誓不從賊仍以原官改授黃州秩滿令
江西瑞金邑多盜計擒渠魁境賴以寧多惠政去之
日童叟攀泣卒年七十有四子殿邦官翰林嘉卉爲
熊文端舅氏文端兄翁髫齡遭亂巢傾卵覆賴嘉卉
保護得脫於讐且授經焉文端嘗曰居心厚行已端
事上敬與人忠舅氏其庶幾乎

胡必蕃孝感人順治辛卯舉人知蒲縣性廉潔不名

一錢政以慈爲本張弛具有次第卓有循吏風

陳應偉字士嵩孝感人中順治辛卯順天鄉試令山
東青城縣盡心拊循抑豪右政餘時進士子論文課
藝康熙丙午分枝得四人皆成進士致仕歸著書教
子有四書聽稽尙書正解行世子世玘辛酉舉人任
蘄水教諭陞武昌府教授

熊賜履字青嶽一字敬修孝感人八歲時父歿於難
母李苦節嚴課讀嘗置書案於紡績所以荆條隨伺
稍懈卽跪而擊之述當年慘毒狀母子淚瑩瑩甫弱
冠卽貢成均順治丁酉戊戌聯捷選翰林一時館閣
大制作咸出手定有司以母節

閣隨下所司集議

詔旌其閣初

世祖崇獎儒術卽首加眷注

聖祖親政銳意求言時方爲學士應

詔上書娓娓數千言悉嘉納之晉閣學一日

召至內庭

命作楷書以敬

天法

祖知人安民八字進蒙

溫獎隨

命講大學中庸首章嘆曰果宿學也遷掌院事知

經筵猶以切實在於日講先書後經次及子史遂

命進講弘德殿弘德猶古之崇政也辰入酉出或漏下四

鼓乃出或隨出隨召

恩禮勤篤從古未有

特命以武英殿大學士兼刑部尙書入閣辦事後因票擬

失

旨罷歸僑寓金陵益肆力讀書甲子冬

聖祖南幸江寧慰問諮訪戊辰起太宗伯不數月卽丁母憂

去適

聖駕臨白下賻卹祭奠有加復

御書經義齋額旋以原官召拜疏力辭

允其終喪晉冢宰八年歷別銓務稱治己卯復以閣臣用

兼吏部知

經筵如故癸未引年乞休仍任 京師食俸備

顧問甲申除日

御書壽考二大字賜之丙戌始

予告歸

溫諭再三遣官護送還里明年南巡復召赴

行在款語宴賜己丑年七十五卒諡文端

諭祭墓在任教習庶吉士三科主文武鄉會試八次

殿試克讀卷官五次總裁

世祖實錄兩朝國史政治典訓北征方畧孝經衍義朱子全

書明史總裁自著學統閑道劄記及諸文集皆經

宸鑒公明練達海內稱之其學術最為醇正而慎密孤介

進退人材雖子弟無知者子志伊

召至京以病不能官未幾卒辛丑猶

詔卹其家

項一經字韋庵漢陽人順治己亥進士授建德令土

寇竊發率眾討定之民間生女多弗舉經為文勸誠

其俗乃革行取吏部主事晉郎中出典浙試轉河南

分巡南汝道汝俗役夫悍橫凡葬娶索重賞乃行經

嚴懲之於是家無留榷嫁娶稱便陞貴州按察使因

疾請假歸卒子翹刑部郎中孫鍾嚴嘉興通判鍾建

候補主事

葉封字井叔黃陂人順治己亥進士初任延平推官改知登封縣政修事舉獄訟衰息有古循吏風興復嵩山書院祀二程諸子以最行取主事封少工詩在都門與王士正宋犛顏光敏輩齊名號十子

楊燁漢陽人順治己亥進士授龍門令勤課藝草濫徵葺名宦鄉賢祠新譙樓浚城濠廢墜者無不修理年饑設粥活民無數山寇李三岡肆虐燁率兵深入紅溪捕之寇潛逸民賴以安祀廣東名宦

熊維祺孝感人順治己亥進士知仁化縣時鹽引通年報名富室多竄匿村市為墟維祺設法招商以村報克之害振興學校己酉分校粵閩多知名士卒於官

李皇詔字月航孝感人有雋才以拔貢授皖城倅順治己亥夏海氛披猖皖以孤城斗絕時操撫全師赴勦而郡無守邑無令防江無丞皇詔一身兼攝其任浚隍築壘固結人心七月內海賊蟻聚屢迫皖城且戰且守八月復悉眾來攻皇詔奮勇殲之斬獲甚眾俘解活賊劉玉等先後三千餘人適 京旅南征軍需旁午應時立辦事平擢戶曹

勅授拖沙喇哈番准世襲一次歷陞四川建昌道卒子世

華襲廕

胡必選字簡士孝感人順治己亥進士知桐城縣有
惠政邑北觀音巖水直射城隅多傾圮爲之捐俸加
築且滋灌溉丁未大江南北飛蝗蔽天入桐境忽有
鴉數萬搜啄殆盡人謂惠政所感歷九年解組歸
王度漢陽縣副榜知靈邱縣度常嘆子產治鄭武侯
治蜀得爲政大體及涖官心存仁恕濟以嚴明吏民
無敢軼繩外久而胥愛頌之以疾卒於署敝衣數襲
百姓無不往哭焉

陳國祝字如南漢陽人康熙丁未進士授青浦令再
補永清皆有循聲卓異陞兵馬司指揮未幾乞假歸
居林下誦讀不少間性端肅舉動以禮法自持一時

推重卒年八十八子嘉說候選教諭孫穀辛卯副榜
和廩生以優行舉

孫臯字鳴九漢陽人幼穎異刻苦誦讀康熙壬戌成
進士任內閣中書性至孝以父母老病不求仕進朝
夕定省侍湯藥數十年不懈居喪不入內室春秋奠
墓哀慟如初教諸弟成名友愛特至戚屬困乏者資
給之邑有旱澇首倡出粟賑濟晚年爲先人營葬得
疾易簀之夕墓所工人於初昏見臯再拜墓前倏不
見次早得訃共嗟異之

鄧元正漢陽縣貢生知射洪縣勤宣

上諭以化鄉愚革供應禁私派課農儆惰懲治豪強又詳

設塘舖嚴查私鹽以通商引卒於任民感其德祀名宦

程大畢孝感人少敏異目數行下由博士弟子員貢成均授典籍轉司務歷戶兵兩部郎中擢汝寧知府

政聲卓卓


特授兩廣鹽法道粵鹺政積弊多端大畢悉心釐剔由是帑鹽不致雲屯引課不致日滯商賴之州縣以積引不銷註誤者五十四員大畢請准分限十年帶銷得免處分政餘造士尤多所成就祀廣東名宦

程大緒字嗣有孝感人少孤養母至孝課子弟務實行言笑不苟由選拔歷官教授士林咸景行之

姚諧黃陂人幼穎慧十三補弟子員讀書明大義動履不苟筮仕國子學正轉部郎克

大清會典纂修官出守姚安調元江多惠政分司東充濬築河隄歲饑捐賑民賴以濟陞安徽按察使廉靜明恕疑獄多平反時有生佛之頌致仕歸恬澹自適訓課族子弟多所成就生平友愛諸弟白首怡怡仍如童穉時

張仲璜字半玉漢陽人康熙戊辰由明經授梧州府同知古雍塘大蓉山巨盜盧元登數為民害璜密計擒其魁餘黨解散未幾丁父艱歸因疾家居數十年置義田贍族歲款更糴穀益之獎進後學惟以讀書



立品爲務年七十一卒子坦麟康熙辛卯舉人歷內閣學士署江西巡撫

屠沂字艾山孝感人父奏劾歲貢生以德行稱鄉里沂幼以孝聞博覽經傳甲戌成進士授蔚縣知縣擢知隴州所至緩征薄斂不尙威猛而發奸摘伏如神隴舊苦役煩兼多虎患時羽檄紛馳沂抗不加派虎患自息人謂惠政所感屢遷吏科給事中掌戶科拜左僉都御史歷居言職知無不言晉順天奉天二府尹力劬豪猾進左副都御史巡撫浙江潔已愛民陋規概不染指尤以備荒慎獄爲急中小壘爲海潮故道頻年潮衝小壘山北爲患甚劇沂爲文虔禱山北

沙漲數十里水徙山南人獲利賴沂有詩云詎意蛇龍波底窟別開清淺鏡中天紀其實也以疾乞歸卒於家子用謙辛丑進士由度常改知禹州有能名餘悉能世其家

江藻字魚衣漢陽人以拔貢知龍巖縣時耿逆變後民苦催科藻令民自封投納輸將恐後編審人丁裒多益寡務得其平莊戶久爲民累力請上司題免莊米四百四十餘石代賠舊逋三百餘兩巖俗刁訟藻不遺差拘設立木皂管勾判斷明決案無畱牘又捐俸修

文廟建新羅書館創景雲橋士民德之

孫章字倬菴臯第康熙己卯舉人歷刑部郎中出守
 惠州抵任卽盡革陋規免博羅夫役當差民感其德
 立祠祀之惠俗尙詛咒蓄毒草以戕人悉嚴禁之建
 義學革考費均對讀擒巨盜其平糴賑粥二法尤爲
 欽差趙申喬傳紳所稱總督趙弘燦以才守兼優薦陞左
 江道未至卒于光祀官刑部郎中

黃州府

唐閻伯璵麻城進士築居臨河上名閻家河咸淳間爲
 洪州都督王勃滕王閣序都督閻公之雅望榮戟遙臨
 周墀字德升其先汝南人自襄城侯靈起徙居黃岡歷
 梁隋皆顯仕唐書列傳墀少孤事母孝舉進士屬詞高

古文宗雅重之李訓鄭注以黨逐諸名士墀雖嘗爲李
 宗閔所禮亦無以罪也累遷至義成節度始封汝南縣
 男宿將暴驚不循命者鞭其背一軍大治以兵部侍郎
 召判度支進同中書門下平章事遷中書侍郎建言故
 宰相李德裕重定元和實錄竄寄他事以廣父功遂削
 新書河東節度使王宰重賂權倖求同平章領宣武墀
 言天下大鎮如并汴者幾宰求何可厭宣宗納之駙馬
 都尉韋讓求爲京兆持不與繇是妄進者少衰會議河
 湟事不合旨罷爲劍南東川節度使駙馬都尉鄭顥言
 於帝曰世謂墀以直言相亦以直言免帝悟加檢校尙
 書右僕射卒贈司徒

魏英字時育黃梅人以義俠聞為太原兵馬將與高駢友善子元術尤稱機警王仙芝據黃梅英閱卒七千助招討使會元裕破之殺五萬餘人追斬芝傳首長安已而黃巢逼蘄春又密遣子通駢及蘄黃招討使劉巨容合兵躡之賊死者什七巢因窘挫轉掠他郡事聞封英五原郡公太子少傅元術左驍衛大將軍南樂郡公

舊通志

南唐丁必稱字季言蘄州人知臨江軍時江西和買例以稅產均敷無稅者以物力稱積郡帑贏餘代輸之乃請於朝乞永與蠲免擢潼川提點刑獄

舊通志

陳起南唐書蘄州人性剛梗尤惡妖異昇元中以進士

起家令黃梅斬妖人諸佑由是知名官至監察御史卒

元薛天定蘄水人宋末盜起里人推為郡長募義勇保

障寇不敢深入元世祖下江南手詔拜為防守尋擢先

鋒使從平閩定廣下越取淮遷溲萬戶府總管番漢兵

馬使再遷兩淮防禦都招討總鎮江南上護軍至治癸

亥寇至淮力戰卒於軍上遣中使護喪贈總帥諡威武

錫賡至孫薛徵入明從太祖叅知幕府

舊通志

朱仕俊字時英蘄州人耿介好讀書至正間以太學生

授樞密院經歷出守贛州力除淫祀改潮州擒大盜調

判延平遷同知致仕歸

陳子英江州義門陳氏後泰定初徙黃梅十世同居門

以內尺帛斗粟無私者元末大饑英妻勸異居即出之以明經領鄉薦官提舉

明詹徽黃岡人洪武中任都御史持憲有聲大誥嘉美之終吏部尙書

柳良正蘄州人洪武中以功封吉安侯 以上舊通志

康鐸字伯聲明一統志茂才長子襲封蘄春侯少有父

風十歲入侍太子大本堂讀書太祖瀛宸翰賜鐸云謹

承祖業愛爾勤功八年詔往墾鳳陽荒田十年統兵征

辰州峒獠十一年遂平松疊諸州十三年巡沿海諸城

十四年從征南將軍傅友德征雲南克普定破華山諸

砦十五年卒年二十三贈宣力武臣蘄國公諡忠愍 並

見舊通志

李寧楚紀字景安麻城人洪武初令餘干才識英敏值群盜竊發寧率鄉兵協同官軍擒盜魁散其黨數百人歲饑移粟賑濟民懷其惠勒石以誌不忘

於顯楚紀黃梅人好讀書善騎射豁達多大節屢從太祖征伐有功官至前軍都督僉事卒贈陰山侯諡襄武

戴綸分省人物考綸字經邦蘄水人英邁方正篤於孝友領洪武庚午鄉薦任山東道監察御史出按山東風

裁凜凜以糾劾忤時貴謫梧州通判再謫庫官尋改監倉糧歷官以清苦忠義自持時貴欲致之死以無隙而

止

薛均分省人物考。蘄水人以懷才舉上十策高帝異之。會其母疾危固請放歸。明年以均同知泰州。除知合州。治行第一。文皇召爲太僕寺卿。丁內艱歸。補應天府尹。買舍旁片地種菜。嘗自芸之上。廉得其狀。笑曰。人皆樂惟朕與均獨苦也。頃之乞歸。年七十。特進禮部侍郎。或疑其歸裝頗重。於中途發之。惟紙馬板一具。曰。遺兒孫無他物。令業此自給耳。文皇知其貧。命有司賜官湖。頃餘。後人因名曰欽賜湖。又曰薛家湖。子孫世守之。兼鬻紙馬。至今巴河有薛紙馬之號。

王景字時亨。黃岡人。先世以武功顯。永樂間。襲榆林千戶。正統土木之變。上北狩。景與袁彬等七人擁護。甚力。

及復辟。詔問景安在。時已卒。特諭祭葬。贈武畧將軍。一子世襲。後以子璘貴。贈中憲大夫。舊志

劉以文。楚紀字彥章。黃岡人。洪熙中。任溫州府照磨。以廉能稱。擢知太和。改陽城。有美政。璽書褒嘉。增秩命再任。後致仕。民爲樹碑。歿時耆老數十人赴弔於家。且立祠祀之。

耿光字謙甫。黃安人。成化辛卯舉人。四任學博。以春秋歷聘分考。所在得人。初應四川聘。有貴勢遣人以重賄。丐錄其子光。焚其書。麾使去。性篤孝。每念養不逮。親居常悲愴。賦詩以見志。誦者感焉。

王本儉字節之。麻城人。成化戊戌進士。初授吳縣。改豐

城父遺詩塲之因刻石後堂日夕自省由是豐城大治

歷桂林副使會蠻寇譁乃提兵蕩平之卒於軍以上舊通志

熊經分省人物考經字載道麻城人成化戊戌進士令

無錫有惠政諸生卻寶吳學輩皆其所資給賞拔者時

有徐姓作石槲於太湖欲毀民居開河通舟經弗許六

載內召為人中傷出知陝西隴州以疾致仕經性剛氣

豪善談論敦孝友有東溪集行世

舒崑山字楚瞻明一統志麻城人幼奇穎成化甲辰進

士累官副都御史所至有政績能文章一時碑碣多出

其手

李汰分省人物考汰字清之蕪水人性謹厚敦行孝弟

少失怙終身哀慕領成化丙午鄉薦任義烏教諭郡守

廉其貧遺金三百汰悉以修學福建聘為鄉試同考官

或餽金通關節汰嚴拒其人以腐儒譏之汰謝以詩曰

義利源頭頗識真黃金難換腐儒貧莫言暮夜無知者

克塞乾坤有鬼神其人慚退致仕卒著有立菴集

陳文字簡之麻城人弘治戊午舉人令崇明遇風潮大

變奏請賑濟活三千餘人又擒海賊施琪父子以抗言

忤巡按某調延川歷戶部員外尋出為襄府左長史文

外和內剛居官清介歷任幾三十年田廬如故著有自

怡集

郭文輔字良弼蕪水人少時家貧父使牧牛輔挾筆研

及獨足儿就巖間註周易弘治甲子舉於鄉官鹽課提
舉著清聲解官歸家忽火輔籲天曰有不義物願焚之
火遂滅嘗曝日中葺敝履督稅吏執之尋知爲輔甚懼
輔曰汝非知我何咎焉笑而遣之

郭慶字善甫黃岡人質直力學正德丁卯舉於鄉令清
平以廉稱勤於撫字捐俸給貧民牛種在官五年乞休
歸家居不治恒產遇荒歲贍親鄰困乏好吟咏著述甚
多以上舊通志

毛鳳韶字瑞成明一統志麻城人正德辛未進士知江
浦縣有善政擢監察御史上弭災八事如復舊制以草
鍾守尤關天下利害巡按陝西雲南貪墨吏皆望風引

退終雲南僉事有聚峯文集

劉淑相分省人物考字養忠麻城人正德甲戌進士授
南京兵部主事武宗南狩參贊尙書喬宇選一人奉迎
諸司皆憚行相獨請往得旨還宇深器焉歷任順天府
尹執法秉正權貴多憚之未幾與內閣訐奏下錦衣獄
尋放歸卒於家

喻希禮字節之麻城人嘉靖癸未進士以重慶推官擢
御史會議大禮杖謫者多斃荒徼禮上疏極諫又切論
禁中集羽流設醮世宗震怒閣臣夏言力掇乃廷杖謫
戊六安十餘年赦歸卒隆慶朝追贈光祿少卿賜祭舊
通志

汪文淵字赤崖黃岡人嘉靖己丑進士授庶吉士改戶部郎中歷金華知府時嚴嵩擅權其僕怙勢甚橫淵捕逐之嵩每欲加害媒藥無所得僅免官歸

舊通志

胡明通分省人物考羅田人孝友篤學幼育於諸兄終身事之如父同居四十年毫無間言領戊子鄉薦以兄疾不上公車者三兄卒為服齊衰撫孤姪如子授信豐知縣設法賑饑退賊彌盜有奇功三載考績陞金華府判甫一月致仕家居儉約如寒素所著有征邁集第明書同舉於鄉以文學齊名

劉琪字商陳黃岡人嘉靖庚子舉人除黃縣令摧鋤豪右無所避海賊臨城肆掠拒却之遷知寧羗民被仇家夜殺三人索屍不得琪焚香告天雷發其屍而冤雪歷仕不置生產居鄉以公亮稱

程鳳金黃岡人嘉靖己酉舉人令彭澤多善政性方正不阿直指按部至金上謁獨後直指諂讓之金出為詩懸縣門云一生惟拙天知我三載無能我愧官今日銓衡方論定好歸舊隱理漁竿遂掛冠歸直指旋悔遣牙官追之竟不返邑人立祠祀之有禱輒應

以上舊通志

曹麟三楚文獻錄字汝祥黃梅人嘉靖庚戌進士知許州剔宿弊勸農桑建西湖書院課士會劇盜司尙照來寇麟登埤為好語賊心易之渡濠薄城麟已令城濠皆盛沙壅水俟半渡決水溺之賊走追斬數百級入為民

部郎擢天津兵備倭寇不敢犯境以兩親竝八旬告歸
終養

陳仕字又愚黃岡人嘉靖壬子舉人授弋陽令築城捍
賊遷嘉興通判從胡宗憲破倭有功晉同知以母老乞
歸家貧教授自給友愛兩弟其子九疇應貢在弟前令
稱疾不出弟遂得先貢

舊通志

袁文伯字侗齋黃岡人性至孝嘉靖甲子舉人授潛山
令三年政簡易民和樂會有江院白某者過潛歲荒民
貧無所取給白不憚呼語之曰子讀中庸桑遠人乎曰
知縣只解讀子庶民而已乃即日掛冠歸養親不懈者
三十餘年有詩集十卷

梁宸字西橋麻城人少穎悟嘗錦童太史家童偶閱漢
書有遺失宸悉記無訛成童補廩餼三讓貢與年長者
卒就廣文與許吏部善臨選許令自擇宸曰有命乃簽
成都許又欲致其子補廩餼宸力辭曰年少當力學功
名易得亦易失也

劉天衢字一登廣濟人隆慶辛未進士授中書舍人神
宗卽位選御史憂形於色耿定力怪問之曰監察職不
易稱也無何御史傅應貞劉臺咸以論列元輔被逮衢
毅然疏救卒獲保全累遷陝西少參駐興安先是興安
水災民多流亡衢下車議賑且築隄濬濠全活甚衆未
幾遷雲南憲副時巡按汰客兵兵鼓譟執同知強爲帥

衢令於所過驛舍掘間道陰出之賊大沮轉金滄道左
參政值緬人入犯乃移駐賊衝集入郡材官及諸司土
兵分討之凡四閱月盡復故所陷地遷山西按察使加
太僕寺卿致仕

杜仲字冲字黃岡人隆慶辛未進士仕至松潘兵備捍
守邊陲以勤事卒巡撫喬維新爲治喪事發篋僅敝衣
數襲聞於朝賜祭葬贈太僕少卿

易之貞字忠甫蘄水人隆慶辛未進士署清浦教諭以
廉勤擢戶部郎中督餉易州奏免積逋二十萬行部至
良鄉憫逋糧故官爲請減十之九且捐俸代償之奏罷
曠墾王虎卒爲忌者所中出守馬湖三月歸

陳萬卷字德備黃岡人以吏員授安平尉值白蓮賊謀
襲城卷白令督捕擣其穴三戰皆捷賊帥頂金冠作妖
術紙人馬驟起卷積誠呼天會大風雨紙皆破壞賊衆
就縛撫按上其功賜金帛擢永平通判

楊民服字信甫廣濟人性孝友弟邁疾瘠沐露禱嘗讓
弟廩餼應貢讓翟又讓趙曰翟以資淺趙以誑誤吾不
讓二君其遂已乎後司訓吳縣遷蔚州學正專心聖學
以求放心奪本體爲訓

湯之相字惟尹廣濟人少貧父爲縣吏不能自給相假
市肆貿易取資夜讀萬曆丙子舉於鄉由學訓爲南助
教晉刑部郎出知黎平府地雜苗獠相飭綱紀釐嫁娶

科條使男女有別俗殺人不抵惟以銀贖故仇殺益多
相不爲末減乃少戢清操自持不濫取一錢黎民說之
汪可受字靜峯黃梅人萬曆庚辰進士歷官至少司馬
初爲金華令政聲卓然轉吉安太守設書院課士爲山
西督學得人稱盛奉命濬河及秉鉞禦邊俱有功績神
宗賜宴旌爲天下清廉第一及卒詔予祭葬廕子

魯之賢字伯良麻城人萬曆壬子舉人令深澤北俗輕
生賢禁溺縊嚴反坐刑以是清他邑疑獄上官多藉獻
決奏最擢御史首劾貪撫張明綱巡按宣大會代藩
廢長立幼上疏切論實爲當時國本地也後卒於官

陳楚產字北學麻城人困童子軍遂以白衣中式萬曆

癸未進士令博野清廉勁直百姓稱陳青天遷兵部主
事歸里數十年不起凡邑中利弊輒言於令篤交遊不
以貴賤易視梓里咸敬愛焉

何鳳起字近邾蘄水人徵時嘗遇虎從容語曰吾終當
大用汝則逝否則死汝口虎俛首而去旋舉萬曆癸未
進士授棗縣令善聽訟使人得從容自理不曲事上官
張居正子懋修北上所過餽遺起獨贈以疏布居正聞
而驚曰此必清操令也起適罷職居正言於朝卽日遷
知廣德歷刑部郎雲南按察副使

張穎字平岡廣濟人篤志好學乙酉舉於鄉知舞陽爲
政務飭大體釐弊竇鋤強悍邑中神像皆易以木主曰

鬼神何常形而儼然貌臨人乎盡毀之以上舊通志

王一鳴分省人物考字伯固黃岡人七歲郡舉神童萬曆戊戌成進士與同年生謁政府王錫爵獨揖之曰子天下才也授太湖令值歲大歉泣請罷逋賦又請帑金易麥種給民發廩煮粥修築隄堰民賴以蘇居四載移任臨漳卒於官

何天申字德錫黃岡人萬曆辛卯舉人授廬州判三載召判順天時乾清宮災歷代珍寶幾盡上按籍召商買補申抗論明王不貴異物今珠寶價凡一千一百四十萬有奇取之太倉則不足取之加派則厲民惟宜加意修省以回天變疏入落三級外補無爲州判築護魚鱗

三十里積數歲始成民賴其利移判鳳陽尋致仕歸卒初申夢入古廟見判贈之以其帽後居官三十年陞降不離郡判云舊通志

胡恩字前江黃州衛指揮督運漕艘輒報最累遷瀘州參將移鎮松潘諸土司長官例奉金幣恩一切擯斥威令大布三載進秩總兵

曹大受字無可麻城人萬曆甲午舉人令浙江新城理滯獄鋤巨憝因性鯁介左遷蜀藩長史會奢賊變募死士擊之以功擢貴州兵備副使復晉階一級意有不合竟拂衣歸

熊所師字呂原麻城人家貧歲歉有知交餽稻數十斛

分給親友一時悉盡從弟妹不能自存者教養婚嫁之
萬曆丁酉舉於鄉司李虔州守將縱兵剝民按法劾罷
隨為州將所中謫廬州判州有豪強犯法前守屢捕不
出師攝州事擒置諸法後調北流令卒櫬歸貧不能葬
袁世振字滄孺蘄州人萬曆戊戌進士令臨川陞戶部
郎時邊餉仰給鹽課鹽法久壞商引不行振為十議上
之上覽奏嘉其能特命為兩淮疏理鹽法副使賜璽書
疏理之官自此始

王育德字澤寰麻城人萬曆庚子舉人初知嵩明州東
川王蠻之變以擊賊功陞僉事守永昌佐巡按姜籌策
擒斬叛蠻馬一駿分巡臨元規復十八寨蠻婦歸阿迷

州卒受羈繼觀察黔中銅平蠟耳山苗倡亂率兵入其
界撫之黔賴以安後晉陝西右布政入覲卒於京

蕭魚羅田人萬曆庚子舉人授汝州學正遷溫江知縣
勦奢寇有奇功入為工部主事時魏闖柄國魚不為屈
遷守登州清操如水致仕歸卒

鄭之良字直夫黃岡人萬曆癸卯舉人為叙州丞時烏

蒙安邦產為亂川西南半陷督撫朱燦元屬良監軍乘

賊觴壽日提兵直入其壘擒賊將四十餘員殺傷無算

獻俘京師遷鎮遠知府復征苗有功晉憲副歸

以上舊通志

梅之煥字長公麻城人少孤從母日課書盈寸儻雄
駿異於凡兒萬曆癸卯與楊璉同舉於鄉以功名節義

相期許甲辰舉進士選庶常同館孫承宗獨推重之改
吏科給事中輒扼腕時政上疏極言其大指務在破私
交結黨論矯時救弊愛惜人才尋出爲廣東按察司副
使多所平反天啟元年擢都察院僉都御史巡撫南贛
是時魏璫興大獄逮楊漣考死言官擿漣黨以煥爲首
誣煥在省中受取賕賂坐削籍遣戍會懷宗卽位召以
原官巡撫甘肅煥鈞校羣吏威服邊方其功最著乃以
閹臣某指劾遂解官歸里流賊起秦隴蔓延光黃間煥
用軍法部勒鄉人賊不敢犯麻城者八年後叙甘鍾前
後功加級蔭一子忌之者盈朝卒不果用
見錢謙益初學集
杜應芳字懷鶴黃岡人萬曆丁未進士任禮部主事出

守河間時福藩之國供億浩繁芳議省節三萬金
王之國皆視爲例天津稅璫馬堂橫肆芳得其弟不法
事捕訊之堂坐此遂去督學四川無敢以片牘干者遷
福建按察使歸卒
舊通志

甄淑字錦石黃岡人萬曆丙戌進士授陽武知縣調太
康俱有異政入爲吏科給事天啟間以不附魏璫削籍
歸懷宗卽位起太常累官南北刑部尚書

鄒之易黃岡人少家貧負薪水供母登萬曆庚戌進士
授銅梁令徵解錢糧不取羨餘嘗解餉至府有吏兌銀
稍昂取砒擊之曰窮縣脂膏供汝輩高下其手耶後去
任有存積三千金謀諸邑紳置義倉廣儲積安奢之叛

城賴以全

晏清字泰徵黃岡人萬曆己未進士授蕪湖令蕪關百貨所聚一切日用俱自買置不以絲毫累市人調吳江值水澇為民請命得邀全荒例改折遷吏部稽勲司魏良臣請封伯格不行家宰周應秋怒之遂削職懷宗即位以原官起尋給假歸壬午起考功郎轉廣東鹽法道卒於鬱林以上舊通志

朱翊鉞字昇甫襲封樊山博學工文不喜富貴慕淮南八公之徒折節名士一時士大夫皆與遊著廣齋堂集震岳詩話數十卷鉞弟翊歷字仲良為楚藩宗正工詩文善書翰與兄昇甫齊名

王追臯三楚文獻錄字執之襲祖廷瞻廢由部郎守安順府會奢蘭亂圍黔將一載有勸其緩行者不聽至則安順已隔絕都御史王三善委署平越篆不逾月轉米芻七十萬鼓勵將士一戰而省圍解又署平壩兵備督漢土步騎十五萬討安順自普定抵清河口十七戰皆捷賊首龍蔡二苗皆來降臯深入險阻勞瘁卒於軍子一翥哀號伏闕贈太僕卿予祭廕

官撫極字進之應震仲子以拔貢再任貴陽通判駐畢烏有捍衛功畢烏人肖像祀之陞平越守環境皆苗忽苗帥藍二率萬眾圍城七晝夜極力守禦伺其懈以壯士七十人夜襲賊營擒藍二餘散去以功陞太僕寺卿

致仕歸 舊通志

周弘謨字元文麻城人萬曆間武進士官遊擊同李如栢等戰平壤會倭關白陷朝鮮王師敗朝用沈惟敬議欵令弘謨同惟敬往諭倭誓服輸誠就欵還疏倭情甚悉復遣往議封貢至朝鮮仁施縣病卒今有大將軍周公祠在其國追贈都督僉事廕黃州衛千戶

孫一謙麻城人萬曆間為南司獄官舊重囚米日一升率為獄卒侵漁又散時強弱不均多有不得食者且囚初入獄往往驅之溼穢中得錢乃易燥地謙一切嚴禁給米甚均衣敝為浣濯補緝終其官囚無凍餓凌虐死者秩滿轉靈山吏目王世貞贈以詩云青衫白馬帝城

西祖道無人日欲低猶有苦廬方畝地赭衣能作數行啼

廖自強字中立黃岡人由歲薦授江油令縣有荒糧萬餘強泣言於上吏疏請得盡蠲邑人尸祝不衰

姚明恭字崑斗蘄水人萬曆己未進士授檢討累官東閣大學士加太子少保先是蘄之漕米兌於蘄州州去會城遠軍旗肆科派里甲苦之恭言於當事改兌會城民甚賴焉

何闕中字蘧宿黃岡人天啟壬戌進士歷任四川提學素饒才學復善甄別所拔士皆名儒遷洱海道值亂寇入城大掠闕開署納婦女數千人賊索之急悉出署中

所有贖之生平不問家產子昌祚亦安貧好學務求實
踐以明經終

魏公韓字小韓黃岡人少事祖父母以孝聞天啟乙丑
成進士起家太平令歷汝州大名薊永諸道卓犖多大
節不附魏忠賢不屈張燹憲人以為難後隱居漁臺卒
年八十有一

王源昌字紹貽黃岡人天啟乙丑進士授禮部主事懷
宗十三年分巡大梁時宗室驕恣昌執法裁制不少貸
歲旱人相食大盜蜂起設法賑濟防禦周密郡賴以全
劉宗祥字梧陽黃岡人天啟乙丑進士命金壇舉最為
御史懷宗初巡按江西廷對興利除害數不稱旨繼巡

四川陞見面劾少宰張捷行私捷坐免官後為江西巡
撫致仕

王同鼎字調甫少保廷瞻第三子以歲薦廷試第一人
授順天司訓勤懇造士遷沐陽令調江寧有廉明聲入
為刑部主事孫一鈞舉人鈞子封滌另傳

王同觀字養所廷瞻幼子年十三父臨歿摩頂謂之曰
亢吾宗者必此子後入國學事母董氏盡孝語及摩頂
語輒跪而歃獻與兄同鼎友愛無間教十子皆以文行
顯長追駿丁丑進士正定守追騏戊戌進士翰林庶常
改授禮科給事追騏與孫之鯨同舉庚子鄉試壽九十
三乃卒

王用予字安生黃岡人懷宗戊辰進士授淮安推官捐
造文起書院每月親臨課士歲荒賑饑全活南北流民
以萬計淮有新舊兩城頻苦水患復捐貲爲築三壩兩
城獲全六載舉最爲翰林檢討弟用世戊子鄉舉子澤
弘乙未會魁歷官禮部尙書

王一翥字子雲黃岡人天啟時負才遊京師魏璫屬趙
鳴陽邀爲記室翥一夕棄其僕從間道歸後登賢書隱
廬山智林十餘載晚歸黃岡卒

易士龍字雲間懷宗庚午舉人授醴陵諭葺考亭書院
崇正學尙德行遷大昌令流寇兩次來攻皆力禦得免
寇退門者俘三十餘人以聞論且云前此皆以是得紀

錄龍訊知其陷賊狀盡釋之改宿松遂致仕歸

桂啟芳字叔開蘄水進士授海陽令時海寇劉香老猖
獗芳以計擒其黨林龍角周端偉杖斃之更出奇助督
府平劉香老等忌者奪其功落職歸益讀生平所未竟
書披衣挑燈達曙不倦

曹應昌字石霞麻城人懷宗己卯舉鄉試第一癸未成
進士喜讀書不任吏事授知縣棄歸奔父喪於永昌時
同郡何閔中亦客死於海昌竝挈其櫬歸至昆明昌以
哀毀卒家人欲置何柩屢舁昌柩不起其弟祝曰得毋
爲何先生乎今當偕行耳乃發昌與何竝未一面聞者
益嘆其義所著詩文雄奇偉岸人爭誦之

朱全宰字咸一黃岡人懷宗己卯辟舉授武康知縣以
最召赴京卒於道著有周易內外圖說禮記會通禮記
金丹毛詩類考孟子年表文通詩通詞通曲通樂通韻
通大學權衡中庸權衡諸書曾經奏御發禮部頒行
黃耳鼎字澹巖蘄水人幼好學嘗應順天鄉試道逢老
人哀泣問之乃以冤鬻女鼎紆途三日傾囊贖女以歸
之後試期弗顧會棘闈火改期再試遂得登賢書丁丑
會試第三授中書秩滿召對稱旨擢廣西道御史彈劾
不避權貴巡按陝西值闖賊破都城遂奔赴江南尋卒
高弘基字元開蘄水人懷宗庚辰進士司理大名值歲
饑捐俸市牛種給民山東梟賊木玉逼郡諭以禍福尋

就招撫時流離初復民苦俵馬費重基白直指疏請暫
行改折郡人德之 以上舊通志

皇清陳瑾字公瑜黃岡人家貧好學懷宗甲戌進士授行

人遷吏部郎端方清介順治初以薦起儀曹尋督學
八閩拔孤寒杜請謁權貴不敢干以私歸惟圖書數
卷而已子際鼎由明經累官蔚州牧 舊通志

陳克峻字伯鳴黃岡人懷宗乙亥拔貢授虹縣令有
清名歲旱設法賑救全活萬眾以母艱歸課子著書
不與外事年八十卒子敏常癸卯舉人

詹謹之字仲庸黃岡人懷宗丙子舉人任濟南推官
釐清宿弊力卻鹽引及嶽廟各陋規訊讞務得實情

全活甚衆等以疾歸著述杜門毫不干謁子大衝大衢俱有文行

韋成賢字念莪黃岡人順治丙戌進士授庶常丁亥分枝禮闈得人最盛遷侍讀出爲江南叅政督理糧儲滌除宿弊賦足而民不擾陞右通政以丁外艱哀毀卒

鄧錦字子燦黃岡人順治丙戌舉於鄉歷官兵部職方司主事彰德府通判解組後沉酣圖史被服若儒素端方誠篤里中稱爲長者

汪煉南字治夫黃岡人順治壬辰進士選庶吉士授編修值楚省大祲倡同官疏請蠲賑辛丑督學順天卯戌鄉會兩元皆其首拔士甲辰考最晉侍讀學士以疾假歸卒於舟次

樊維域字念顯黃岡人家世孝友篤於文行登順治己亥進士教授德安究心理學課士以孝翁廉隅爲本遷平鄉令有廉能聲念母老遂力請歸養

曹本榮字厚菴黃岡人誕之夕母夢神送陸雲入室順治己丑成進士選庶常學行端粹以清節自勵等充

日講官注易書稱

旨遷

經筵學士素善病

遺醫診視

世祖嘗作畫以賜一日讀孟子人知之亦囂囂

顧榮曰自得無欲汝足當之其眷注如此子宜溥舉博學

宏詞官檢討

盧紘字澹巖蘄州人順治己丑進士授新泰令陞桂

林府同知歷任蘇松督儲叅議多惠政雖簿書旁午

而操槩懷鉛未嘗少輟州志出其手筆為錢尚書謙

益所激賞比之申叔左史云

李本晟字嵩岑蘄州人順治己丑進士由部郎累官

雲南布政使在官二十年清修澹泊息事寧人後奉

裁歸里吳逆變以晟久遊南密遣謀授偽劄晟縛以

聞

以上舊通志

杜濬字于皇黃岡人以避亂寓白門氣象豪邁為詩

文自闢町畦睥睨一世尤精於五律博極羣書吳楚

人士多就正焉

汪士奇黃岡人順治丁亥進士知東鄉縣康熙甲寅

賊兵肆掠士奇練鄉勇保障孤城復設奇制勝盡追

賊所擄男婦數千人而還賊既平興學校育人才士

民愛戴

胡一璉字公伯廣濟人順治戊子拔貢任兗州通判

先是香爐口河決久弗治璉躬督畚鍤悉心籌畫功

成總河朱之錫特薦陞東昌府同知兼攝司李平反

沈小通
卷之三
大案二十餘事擢戶部員外歷郎中出權龍江關以
廉著會荆襄長隄衝決璉請帑修築兩郡賴焉遷廣
西監司後以路梗留廣東兼筦學政逆藩陷城授以
巡撫僞劄抗節不受及大軍恢復事聞

詔嘉之授廣西布政使以疾致仕

王躬允字爾極順治六年歲貢考授澄海知縣隨

王師赴粵下車訪疾苦問利弊大姓陳退夫壁鷗汀集萬
人保障又有楊許者屬土司素劫掠

王師至先歸命構鷗汀鷗汀懼不敢出降躬允廉得其情
單騎儒服往壁人望見曰王使君來我輩數萬人命
活矣自縛出迎事得解城隅有梟驚居民皆徙避躬

允先以文告卽其宅榜示隨滅蒞澄三載窮簷巨細
無不周知治行爲全粵最解綬歸課子孫讀書不倦

卒年八十有六

郡志

李君柱黃岡人順治七年從征入粵知新安縣潔已
奉公勞心撫字時營兵肆暴守備王守祖復縱之君
柱力爭不得投劾去上官廉得其實守祖被糾民益
感君柱之力

徐熙明字子寧羅田人順治辛卯舉於鄉教諭湘潭
掘汾陽令寬賦減刑丁艱起知永新從征南藩辦理
糧餉屢著軍功因勞成疾遂致仕

王有容字自牧麻城人知龍巖縣時方軍興徵夫取

餉羽書旁午有容多方為民請命乘便增城浚濠儲糧置械及漳郡失守巖孤城無援有容乞師於贛與民瀝血死守賊逼城有容調兵據勝屢挫其鋒賊解去城賴以全

王封濠字五書黃岡人順治戊戌成進士選庶常時年甫十八居官廉慎至性淡泊

御書尊德堂三字賜之歷官禮部左侍郎年六十餘卒於官

諭賜祭葬

王保釐蘄水人順治戊戌進士性孝友和平溫厚與物無忤令通江為政仁恕民皆戴德

吳升東字巢薇黃岡人順治己亥進士授登州推官時于七叛案株連大獄滋起升東反覆讞鞫全活無算累官浙江道監察御史風裁侃侃知無不言以條陳落職旋奉

特旨原官起復協理河道事予告歸卒

李棟字雲浦蘄水人順治己亥進士令樂昌留心民瘼廉介自持懲奸宄恤困窮置義倉建書舍善政累累遷雅州守

宋必達字其在黃岡人初獻賊陷鄂驅城中人於江達夫婦扶父投磯下有片板承載流至陽邏竟抵岸成順治辛丑進士任江西寧都知縣請免清泰懷德

二鄉逋賦招集流亡邑有二城南民北兵達始爲團
練法適聞賊張志在阻兵窺贛南圍寧都請援未集
達率鄉勇與營帥協力破走之境賴以安後奉檄誅
黨亂者達抗言良民脅從原非奸宄願以官職保其
無他上官從之全活者甚衆及解組歸中途爲賊獲
繫密室中夜半忽有多人持兵杖大呼宋公擁以去
蓋寧都百姓也年六十餘卒子敏求戊午解元聯捷
選庶吉士有文行

豐正暹黃岡人父母病躬嘗藥澣垢後任奉天海城
尉有金州豪王守祿通島船爲姦府屬暹治之祿密
賂以千金却不受獄益急祿遂陰賂塾師觴暹而醜
之府廉得狀捕守祿等六人棄市

彭繩祖黃安貢生同知惠州府佐政廉平編審丁口
里闕不費一錢陞石阡知府

張仁熙字長人廣濟貢生少喪父廬墓生芝因編古
孝行十卷以自勵事祖父母歷三十年誠敬盡禮及
歿復廬墓側鄉人爲著孝子慈孫歌撫兩幼弟成立
田宅悉推與善者聚族中子弟課以經術周其困乏
癸丑甲子兩修本省通志年八十四卒子佳晨甲子
舉人任安陸教授

鄭昱字方南黃岡人康熙庚戌進士歷知建陽唐縣
以廉能陞工科給事有敢言聲出爲江兩糧道革除

陋規數萬陞廣西按察司持法平允授安徽布政蒞
官月餘宿弊一清尋以老乞歸讀書教子不與外事
鄉人以爲模楷

徐雲弘字元石蘄水人中康熙戊午北闈鄉試授道
州學正勤課試修文廟陞令建昌潔已愛民革除陋
規邑中廢里俱成村落時有視民如子恤士如珍之
謠以丁艱起白河令卒於官

李中素字子鵠麻城人少孤性孝友慷慨好施以故
家益落工詩文兼長於書畫由廩貢授湘鄉諭爲岳
麓書院長卓異陞閩縣令閩多欺隱至則請按戶清
糧自封投價由是歡聲載道上吏頌式通行之隨以

廉能調臺灣值野番跳梁計擒渠魁餘黨悉平卒於
任

王風采字汝載黃岡人康熙己未進士令會稽徵賦
但取解費不多收一錢俗好訟以謙讓誨化之嚴謝
請託邑之大嵐山連金寧溫台四郡界有白頭賊遙
援耿逆乘歲饑誘民爲亂采捕其魁寘於法餘黨解
散乃亟勸賑貸活者甚衆捐俸建范陽閘土人利之
考試振拔孤寒在官十一年邑稱大治子屏仁庠生
澎仁訓導沐仁教諭

金德嘉字會公廣濟人順治庚子舉於鄉教授安陸
設敬業堂課士以修明正學造就人才爲已任康熙

壬戌領禮闈第一授檢討纂修一統志明史禮經解
義通鑑講章丁卯典試貴州稱得人黔中文風自是
丕變閱二年予告歸杜門掃軌以著述自娛卒年七
十八

張希良字石虹黃安人康熙己酉舉於鄉教諭江夏
甲子預修通志乙丑成進士授庶常歷左右春坊庚
午典試浙江丙子典試順天纂修三朝國史

大清一統志明史春秋講義類函稱

旨賜

御書白羽扇賦後督學浙江旋致仕歸良湛深古學其詩
文為士林推重出門下者咸多所成就云

宋如辰字斗凝黃岡人幼穎敏貧困力學康熙乙丑
成進士選庶常恬淡自守朝會俱直外閉戶讀書炊
烟常絕泊如也歷中允春坊致仕歸教授自給邑令
罕見其面翁敏道工詩古文詞中壬午鄉試

陳大章字仲夔黃岡人康熙戊辰進士選庶常名重
一時以母老乞歸孝養備至山居益究心典籍引掖
後學多所成就教子弟有家法先後俱登科第置節
孝祀田兼以贍族年六十九卒

范基祚字叔文黃岡人少孤母田氏苦節教之成立
康熙丁丑成進士令河南脩川在治五年清操自矢
案無留牘耀最去任民攀轅卧轍使不得行雖婦人

孺子爭看清官擔酒炷香擁餞遍村落父老多泣下者尋以疾乞歸年六十餘卒

萬爲恪字敬如黃岡人爾昌子簡重寡言笑爲諸生時卽存心濟物里中艱食做朱子社倉制倡義捐穀里人賴之康熙丁丑成進士授遂安令冰蘖自矢勤於聽斷立政尤存寬恕及解組歸囊無一錢布衣蔬食晏如也

王漢周字晉侯黃岡人康熙癸未進士授奉節令課最擢內職敷歷西臺庫部郎皆有聲出守鞏昌諸大吏稔其才凡鄰郡重獄委決無虛日多所平反陝人德之有四郡其太守之稱以疾卒於官

王全才字仲默黃岡人康熙丙戌進士任廣東長寧縣邑居叢山中嵐重泉毒人咸危之才曰王陽叱馭何患焉任事愈厲俗尙鬼巫者倚莠民扛淫神鼓吹迎送村落才嚴禁竝祠像毀之巫風頓息盜魁吳辛龍嘯聚久爲民害才幸土兵傾其巢擒辛龍伏法境賴以安卒於任

陳大輦字子京大章弟康熙丙戌進士授粵西永安知州其地獠獍雜處爲定嫁娶喪葬之禮建學興教調西隆革頑葺暴以治行第一陞福建鹽運分司齎政肅清委交閩田稱平允歷福建分巡臺廈道整飭兵備兼理學政賑濟饑民撫綏番落生番歸化者八

社先是臺灣朱逆授首餘孽王忠等仍跳梁輦捕獲
正法詳定文武官庄照舊額分上中下三則清除宿
弊蒞臺三年積勞成疾年四十八卒於官

